



Ebazpena, 2012ko martxoaren 9koa, Ekonomia eta Ogasun Saileko Finantzeta zuzendariarena, EAEko Borondatezko Gizarte Aurreikuspeneko Erakundeek aurkeztu beharreko estatistika- eta kontabilitate-dokumentazioaren ereduak aurkezteko epe berriak ezartzen dituen.

Gizarte Emendiotarako Borondatezko Erakundeei buruzko urriaren 27ko 25/1983 Legeak, 20. artikuluan, erakunde horien kontrol- eta segimendu-jardueraren eremua ezarri zuen eta, besteak beste, bidezko sailari balantzeak, emaitzen kontuak eta eska dakizkien bestelako agiriak aurkezteko beharra azaldu zuen. Halaber, 15.4 artikuluan ezarri zuen ohiko batzar orokorrak, kontuak onesten zituenak, nahitaez bildu behar zuela ekitaldia itxi ondorengo lehenengo hiruhilekoan.

Hori garatuz, aipatutako legearen araupidetza onetsi zuen 87/1984 Dekretuak, 46. artikuluan, Erakundearen jardueraren eta ekonomia- eta finantza-egoeraren jarraipena egiteko modua arautu zuen, kaudimenari eutsiko ziola zaintzearen. Zehatz azalduta, bertan zehaztu zen Erakundeek, eskumena duen Zuzendaritzak ezarritako eredu normalizatuari jarraituz, honako agiri hauek aurkeztu beharko dituztela urtero: aurreko urteko abenduaren 31ko balantzeak, emaitzen kontuak eta administrazio-gastuen berariazko xehetasuna, eta aktibo eta erreserben balorazioa. Halaber, emandako prestazioen kopurua, kideen urteko mugimendua eta eska daitezkeen bestelako datu eta agiriak ere aurkeztu beharko dira, eredu normalizatuari jarraituz.

Orain arte, Borondatezko Gizarte Aurreikuspeneko Erakundeek aurkeztu beharreko informazioa, eta hori aurkezteko epeak, EAEko Borondatezko Gizarte Aurreikuspeneko Erakundeek aurkeztu beharreko estatistika- eta kontabilitate-dokumentazioaren ereduak eguneratu eta onesten dituen Ekonomia eta Ogasun Saileko Finantzeta zuzendariaren 2011ko martxoaren 24ko Ebazpenean egon dira araututa.

Hala ere, 2012ko martxoaren 6an, Borondatezko Gizarte-Aurreikuspeneko Erakundeen otsailaren 23ko 5/2012 Legea argitaratu da Euskal Herriko Agintaritzaren Aldizkarian eta, horrek, 50.3 artikuluan, luzatu egin du besteak beste urteko kontuak onartzeko ohiko batzar orokorra egiteko epea. Aipatutako lege hori 2012ko martxoaren 7an sartu zenez indarrean, aldatu eta eguneratu egin behar dira 87/1984 Dekretuaren 46. artikulua aipatzen zituen eta erakundeek aurkeztu behar dituzten eredu normalizatuak aurkezteko epeak. Dekretu hori indarrean dago legearen kontra ez dagoen guztian eta bidezko erregelamendu-garapena onetsi eta argitaratzen ez den bitartean.

Azaldutakoa dela eta, 87/1984 Dekretuan 568/2009 Dekretuarekin lotuta emandako eskumenak erabiliz, eta aplikatu beharreko gainerako arauak betez, honakoa

XEDATU DUT:

Lehenengoa: EAEko Borondatezko Gizarte Aurreikuspeneko Erakundeek aurkeztu beharreko estatistika- eta kontabilitate-dokumentazioa aurkezteko epe berria.

Aldatu egin da Ekonomia eta Ogasun Saileko Finantzetako zuzendariaren 2011ko martxoaren 24ko Ebazpenaren bosgarren atala. Ebazpen horrek EAEko Borondatezko Gizarte Aurreikuspeneko Erakundeek aurkeztu beharreko estatistika- eta kontabilitate-dokumentazioaren ereduak eguneratu eta onetsi zituen.

Ebazpen hau indarrean dagoenetik aurrera, honako hauek izango dira estatistika- eta kontabilitate-dokumentazioa aurkezteko epeak:

Borondatezko Gizarte Aurreikuspeneko Erakunde guztiek 2011ko ekitaldia ixten denetik aurrera aurkeztu beharreko urteko informazioa hurrengo urteko apirilaren 15etik maiatzaren 15era bitartean aurkeztu beharko da.

Aurreikuspen-planak osatzen dituzten erakundeek 2011ko ekitaldia ixten denetik aurrera aurkeztu beharreko hiruhileko informazioari dagokionez, honela egin beharko da:

- ekitaldiko lehenengo hiruhilekoari dagokion dokumentazioa, ekitaldiko lehenengo hiru hilabeteetako datuak biltzen dituen, ekainaren 15etik uztailaren 15era bitartean, biak barne, bidali beharko da.

- bigarren hiruhilekoari dagokion dokumentazioa, ekitaldiko lehenengo sei hilekoko datuak biltzen dituen, irailaren 1etik 30era bitartean, biak barne.

- hirugarren hiruhilekoari dagokiona, ekitaldiko lehenengo bederatzi hilabeteetako datuak azaltzen dituen, azaroaren 1etik 30era bitartean, biak barne, bidali beharko da.

- eta laugarren hiruhilekoko behin-behinekoari dagokiona, amaitutako ekitaldiaren behin-behineko datuak biltzen dituen, uneko urteko otsailaren 1etik otsailaren 28 edo 29ra bitartean.

Bigarrena: Ondorioak eta publizitatea.

2011ko abenduaren 31ri dagozkion urteko kontuetatik aurrera aurkeztu beharreko dokumentazioari dagokionez hasiko dira aplikatzen Ebazpen honetan ezarritako epe berriak. Ebazpen hau Euskal Herriko Agintaritzaren Aldizkarian eta Ekonomia eta Ogasun Sailaren web gunean argitaratuko da, eta erakunde interesdunei eta Euskadiko Gizarte Emendiotarako Borondatezko Erakunde Baterakundeari jakinaraziko zaie.

Vitoria-Gasteiz, 2012ko martxoaren 9a.

Izpta.: Miguel Bengoechea Romero

FINANTZETAKO ZUZENDARIA.